

MALAYSIA
DEWAN NEGARA
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI RABU, 5 DISEMBER 2012, PUKUL 10.00 PAGI

Bil. 20

PERTANYAAN-PERTANYAAN BAGI JAWAB LISAN

1. PN-1253-L15667
Dato' Abdul Rahim bin Abdul Rahman minta **PERDANA MENTERI** menyatakan apakah langkah-langkah yang diambil untuk memastikan Ketua-ketua Jabatan mengambil tindakan sewajarnya terhadap pegawai-pegawai yang terlibat di dalam amalan rasuah seperti yang telah dilaporkan SPRM bahawa daripada tahun 2009 sehingga Julai 2011, hanya 380 (37%) daripada 1026 kes telah diambil tindakan oleh Ketua Jabatan dan pada tahun ini kadar tindakan hanya 5% daripada 126 kes yang dilaporkan.
2. PN-1253-L15538
Dato' Lim Nget Yoon minta **MENTERI PELAJARAN** menyatakan bilangan guru dibawa dari luar negeri untuk mengajar mata pelajaran Bahasa Inggeris di sekolah-sekolah Kerajaan. Berapakah jumlah gaji dibayar kepada guru-guru ini dalam sebulan.
3. PN-1253-L15531
Datuk Kadzim M. Yahya minta **MENTERI SAINS, TEKNOLOGI DAN INOVASI** menyatakan mengenai apakah penemuan yang telah diperoleh hasil daripada penerokaan kita ke angkasa lepas melalui Datuk Dr. Sheikh Muzaffar yang dibekalkan dengan berbagai spesimen tumbuhan dan makanan.
4. PN-1253-L15974
Dr. Syed Husin Ali minta **MENTERI PENGAJIAN TINGGI** menyatakan sebab sebenar sesuatu perkataan Bahasa Melayu tidak digunakan dan diganti dengan perkataan atau istilah bahasa asing dan apakah Kementerian tidak berhasrat untuk mempertahankan penggunaan Bahasa Melayu sebagai bahasa pengantar di UKM apabila ia membuka pintu untuk pelajar asing di peringkat Sarjana Muda kelak.

5. PN-1253-L15809
Dato' Mohammed Najeeb bin Abdullah minta **MENTERI PENERANGAN, KOMUNIKASI DAN KEBUDAYAAN** menyatakan kejayaan-kejayaan yang telah dicapai di dalam menganjurkan Minggu Malaysia di London baru-baru ini. Apakah Kementerian merancang untuk mengadakan program yang sama di Amerika Syarikat, terutamanya di New York.
6. PN-1253-L15715
Tuan Chiew Lian Keng minta **MENTERI DALAM NEGERI** menyatakan berapakah penjara yang sedang beroperasi, serta memberi jumlah banduan yang menjalani hukuman dalam penjara-penjara tersebut. Kementerian juga diminta untuk menyatakan penjara yang telah penuh.
7. PN-1253-L16110
Dr. S. Ramakrishnan minta **MENTERI KEWANGAN** menyatakan bahawa pengguna kad kredit kena bayar yuran caj termasuk yuran pendahuluan wang tunai dan caj bayaran lewat yang tinggi. Semua ini menjadi satu beban besar dan pengguna terperangkap dalam hutang yang susah nak keluar. Adakah Kerajaan mengambil tindakan untuk mengurangkan caj dan yuran kad kredit ini memandangkan keuntungan besar oleh bank yang mengeluarkan kad kredit.
8. PN-1253-L15864
Dato' Boon Som a/l Inong minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan berapa banyakkah kes Skim Cepat Kaya yang dikesan di negara ini, bilangan mangsa yang terlibat, punca mereka terlibat serta langkah-langkah yang diambil oleh Kementerian untuk mencegah kewujudan Skim Cepat Kaya yang baru serta memberikan kesedaran kepada orang ramai mengenai bahaya skim berkenaan.
9. PN-1253-L15593
Datuk Maijol bin Mahap minta **PERDANA MENTERI** menyatakan butiran berapakah orang Kadazandusun dan Murut yang sekarang bertugas mengikut pangkat dan skil gaji di setiap Kementerian, Jabatan dan Agensi Kerajaan.
10. PN-1253-L15507
Dato' Haji Abdul Rahman bin Bakar minta **MENTERI PENGANGKUTAN** menyatakan berapakah kos terkini pembinaan Lapangan Terbang KLIA2 dan bilakah KLIA2 akan beroperasi. Bagaimana pula dengan landasan kapal terbang ketiga KLIA.
11. PN-1253-L15677
Puan S. Bagiam a/p Ayem Perumal minta **MENTERI PEMBANGUNAN WANITA, KELUARGA DAN MASYARAKAT** menyatakan apakah peruntukan RM25 juta untuk pemeriksaan percuma Mammogram memadai serta apakah langkah-langkah Kementerian untuk mendekati wanita-wanita untuk mengambil bahagian dalam menjamin tahap kesihatan warga kaum hawa di seluruh pelosok negara.

12. PN-1253-L15768
Puan Hajah Mariany binti Mohammad Yit minta **MENTERI KEMAJUAN LUAR BANDAR DAN WILAYAH** menyatakan apakah ada mekanisme rayuan dan semakan semula dasar mengenai pelajar tajaan MARA 2012 Lepasan SPM bagi skim pelajar cemerlang bidang kritikal - perubatan yang mendapat tempat di universiti terkemuka Timur Tengah yang terpaksa menolak tawaran tempat melanjutkan pelajaran di sana kerana kos dan bayaran balik yang tinggi jika dibandingkan mereka melanjutkan pelajaran di IPTS dalam negara agar mereka ini dibantu dan beban bayaran balik mereka ini lebih rendah.
13. PN-1253-L15554
Puan Norliza binti Abdul Rahim minta **MENTERI KEWANGAN** menyatakan apakah langkah-langkah yang diambil oleh 'Security Commision' untuk mengelakkan berlakunya '*insider trading*'.
14. PN-1253-L15396
To' Puan Hajah Zaitun binti Haji Mat Amin minta **MENTERI KEMAJUAN LUAR BANDAR DAN WILAYAH** menyatakan sejauh manakah kerjasama antara RISDA dan FELCRA Berhad mampu membantu meningkatkan pendapatan pekebun kecil seluruh negara khususnya pengeluaran getah dan kelapa sawit.
15. PN-1253-L16026
Datuk Raja Ropiaah binti Raja Abdullah minta **MENTERI PEMBANGUNAN WANITA, KELUARGA DAN MASYARAKAT** menyatakan dalam proses untuk mencapai negara maju 2020, Kerajaan diminta untuk menyediakan infrastruktur dan kemudahan serta manfaat-manfaat yang bersesuaian untuk rakyat warga emas supaya mereka terus dapat memberi sumbangan dan khidmat kepada negara Malaysia tercinta. Manfaat termasuklah pengangkutan awam seperti (kereta api/bas percuma) potongan harga di restoran dan di tempat membeli-belah/*medical* percuma dan lain-lain. Bolehkah satu *senior citizen* kad di sediakan untuk 60 tahun ke atas dengan berbagai kemudahan percuma dan insentif diberi.
16. PN-1253-L15951
Puan Hajah Noriah binti Mahat minta **MENTERI KESIHATAN** menyatakan jumlah pesakit HIV/AIDS mengikut umur dan adakah Kementerian akan mengadakan peruntukan wajib menjalani ujian saringan HIV/AIDS kepada mereka yang akan berkahwin terutamanya di kalangan remaja belia yang semakin meningkat bilangan yang dijangkiti.
17. PN-1253-L15782
Puan Chew Lee Giok minta **MENTERI PENGANGKUTAN** menyatakan bagaimana sambutan orang ramai untuk Kad Komuter 1Malaysia, bagaimana Perkhidmatan Komuter KTMB untuk menampung pertambahan pengguna, dan apakah perancangan KTM untuk menambah 'coach' dan lokomotif.

18. PN-1253-L15896
Datuk Chin Su Phin minta **MENTERI KEWANGAN** menyatakan mengapakah sejak akhir-akhir ini, jenayah pecah dan rompak mesin ATM semakin berleluasa, apakah kawalan keselamatan dan CCTV yang sedia ada sudah tidak sesuai pada masa sekarang dan apakah langkah-langkah Kerajaan dalam membendung aktiviti jenayah ini.
19. PN-1253-L15744
Dato' Jaspal Singh minta **MENTERI PERDAGANGAN ANTARABANGSA DAN INDUSTRI** menyatakan bilangan syarikat yang telah mendapat manfaat daripada RM2 bilion pinjaman untuk SME seperti yang diumumkan dalam Bajet 2012. Apakah pecahan pinjaman ini mengikut sektor industri dan berapa peratus daripada pinjaman ini telah disalurkan untuk kaum India. Berapa peratus daripada pinjaman ini telah disalurkan kepada syarikat baru yang ditubuhkan kurang daripada setahun.
20. PN-1253-L16108
Dato' Syed Ibrahim bin Kader minta **MENTERI PELAJARAN** menyatakan kejadian buli terutamanya di kalangan pelajar India Muslim di sekolah masih berlaku walaupun pelbagai aduan telah dilaporkan. Apakah langkah-langkah yang diambil oleh Kementerian mengatas masalah ini.
21. PN-1253-L15600
Tuan Syed Shahir bin Syed Mohamud minta **MENTERI DALAM NEGERI** menyatakan adakah pekerja migran yang mengemukakan aduan/tuntutan terhadap majikannya di Pejabat Tenaga Kerja dapat terus tinggal dan bekerja sehingga kesnya diproses dan selesai dibicarakan.
22. PN-1253-L15453
Tuan Haji Ahamat @ Ahamad bin Yusop minta **PERDANA MENTERI** menyatakan:-
 - (a) bagaimana Kementerian melihat dengan pembukaan taman LEGOLAND di Nusanjaya Iskandar Malaysia mampu merancakkan aktiviti dan nilai hartanah dan minat pelabur asing ke Iskandar Malaysia; dan
 - (b) impak dan kesan masa depan hasil persaingan sihat dari Taman Tema Universal Studio (USS) di Singapura.
23. PN-1253-L15395
To' Puan Hajah Zaitun binti Haji Mat Amin minta **MENTERI PELANCONGAN** menyatakan jumlah pelancong dari Eropah Timur seperti Rusia, negara bebas jajahan Soviet Union seperti Uzbekistan dan negara-negara Balkan seperti Bosnia dan Serbia serta nyatakan langkah-langkah Kementerian bagi menarik pelancong-pelancong dari negara berkenaan.

24. PN-1253-L15492
Dato' Nalla K. S. minta **MENTERI PERTAHANAN** menyatakan pertimbangan agar mana mana pelatih yang dipilih menyertai Program Latihan Khidmat Negara (PLKN) diberikan pengecualian sekiranya mereka menghadapi masalah kesihatan.
25. PN-1253-L15691
Dato' Muhammad Olian b Abdullah minta **MENTERI BELIA DAN SUKAN** menyatakan peranan dan sumbangan yang dilakukan oleh pihak swasta dan GLC dalam memajukan bidang sukan di negara ini agak berkurangan kalau dibandingkan dengan beberapa negara maju.
26. PN-1253-L15743
Dato' Jaspal Singh minta **MENTERI PERDAGANGAN ANTARABANGSA DAN INDUSTRI** menyatakan bilangan syarikat yang telah mendapat manfaat daripada *SME Revitalisation Fund* dan *SME Emergency Fund* yang telah diumumkan dalam Bajet 2012 dan berapakah baki yang masih tinggal dari kedua-dua peruntukan tersebut. Apakah tempoh masa bagi memproses aplikasi bagi kedua-dua skim ini.
27. PN-1253-L15427
Dato' Dr. Johari bin Mat minta **MENTERI DALAM NEGERI** menyatakan apakah tahap keselamatan negara ini dan sejauh manakah keberkesanannya program dan pelan pencegahan jenayah yang dilaksanakan oleh Kerajaan dalam Program Transformasi Kerajaan (PTK).
28. PN-1253-L16126
Dr. S. Ramakrishnan minta **PERDANA MENTERI** menyatakan bagaimana Iskandar Malaysia telah memberi manfaat kepada rakyat Johor sehingga sekarang.
29. PN-1253-L15971
Puan Hajah Noriah binti Mahat minta **MENTERI DALAM NEGERI** menyatakan sejauh manakah pembabitan rakyat Malaysia dalam aktiviti militan seperti Al Qaeda, dan apakah tindakan bagi memastikan rakyat negara kita tidak terlibat dalam aktiviti ini.
30. PN-1253-L15698
Datuk Haji Yunus bin Haji Kurus minta **MENTERI PENGANGKUTAN** menyatakan pandangan Kementerian berkaitan laporan bahawa hanya 25 hingga 40 peratus pengguna jalan raya mematuhi peraturan lalu lintas.
31. PN-1253-L15997
Tuan Subramaniam a/l Veruthasalam minta **MENTERI KESIHATAN** menyatakan mengapa Kerajaan tidak mengawal jumlah penuntut kejururawatan dari awal lagi untuk mengelakkan situasi kekurangan peluang pekerjaan untuk jururawat, dan adakah apa-apa cadangan untuk memberi latihan tambahan kepada mereka agar dapat diserap ke dalam sektor perubatan dalam bidang lain yang kekurangan pekerja.

32. PN-1253-L15598

Puan Hajah Khairiah binti Mohamed minta **MENTERI DALAM NEGERI** menyatakan bilangan kes yang dilaporkan untuk kesalahan di bawah Kanun Keseksaan bagi Seksyen 382, Seksyen 457, Seksyen 452, Seksyen 453, Seksyen 324, Seksyen 326, Seksyen 379A, Seksyen 375 dan Seksyen 148 dalam tahun 2008, 2009, 2010, 2011 dan 2012.

33. PN-1253-L15577

Datuk Pau Chiong Ung minta **PERDANA MENTERI** menyatakan:-

(a) apakah sambutan terhadap PRIMA semenjak ia dilancarkan dan jumlah rumah yang telah pun siap dibina di bawah PRIMA dan berapa orang telah pun berjaya mendapatkan rumah tersebut; dan

(b) adakah PRIMA juga akan dilaksanakan di negeri Sarawak dan jika ya, apakah status terkini pelaksanaan di Sarawak.

34. PN-1253-L16095

Dato' Syed Ibrahim bin Kader minta **MENTERI DALAM NEGERI** menyatakan sejak kebelakangan ini ramai pesalah yang dibebaskan daripada Pusat Tahanan Simpang Renggam mengakibatkan peningkatan kes jenayah seperti ragut dan rompakan. Berapakah jumlah kes yang telah direkodkan terhadap semua pesalah yang dibebaskan dan apakah langkah-langkah Kementerian menangani masalah yang semakin berleluasa ini.

35. PN-1253-L15589

Datuk Maijol bin Mahap minta **PERDANA MENTERI** menyatakan sama ada pengiraan undi akan dibuat di semua tempat mengundi di seluruh negara amnya dan di Kota Marudu khasnya, dan kenapakah keputusan Pilihan Raya pada tahun 2008 bagi kawasan Parlimen P. 168 Kota Marudu dan kawasan-kawasan DUN di bawahnya iaitu N.4 Matunggong dan N.5Tandek hanya diketahui dan diumumkan pada keesokan harinya walaupun semua peti undi sudah pun dihantar ke pekan Kota Marudu (tempat penjumlahan undi) di mana perkara ini masih diperkatakan oleh orang ramai di Kota Marudu sehingga ke hari ini.

36. PN-1253-L15810

Dato' Mohammed Najeeb bin Abdullah minta **MENTERI WILAYAH PERSEKUTUAN DAN KESEJAHTERAAN BANDAR** menyatakan tentang bilangan petak letak kereta yang terdapat di Pusat Pentadbiran Putrajaya. Apakah usaha Kementerian bagi memenuhi permintaan yang semangkin meningkat dan apakah langkah-langkah untuk mengurangkan kesesakan di persekitaran Putrajaya pada waktu-waktu tertentu.

37. PN-1253-L15456
Tuan Haji Muhamad Yusof bin Husin minta **MENTERI DALAM NEGERI** menyatakan statistik dan keberkesanannya Ops Selamat 1 jika dibandingkan dengan Ops Sikap yang terakhir. Dan apakah langkah-langkah yang diambil untuk memastikan Ops Selamat seterusnya lebih berkesan.
38. PN-1253-L15683
Dato' Muhammad Olian b Abdullah minta **MENTERI KEWANGAN** menyatakan isu-isu syariah dalam sistem kewangan Islam, meningkatkan kerjasama dan penyelarasan di antara institusi kewangan Islam dan strategi ke arah menjadikan Malaysia sebagai Pusat Kewangan Islam.
39. PN-1253-L15374
Puan Hajah Rohani binti Abdullah minta **MENTERI BELIA DAN SUKAN** menyatakan adakah Kementerian bercadang menubuhkan Yayasan Pembangunan Belia 1Malaysia bagi memudahkan dan menjaga kebijakan belia secara menyeluruh dalam semua aspek.
40. PN-1253-L15961
Dr. Syed Husin Ali minta **MENTERI KEWANGAN** menyatakan kriteria pemilihan pengurus bank dan mengapa sehingga sekarang Bank Simpanan Nasional masih belum ada pengurus.
41. PN-1253-L15366
Tuan Haji Abdul Shukor bin Mohd Sultan minta **MENTERI DALAM NEGERI** menyatakan apakah langkah-langkah yang diambil oleh Polis Diraja Malaysia (PDRM) bagi menjadikan Kuala Lumpur sebagai antara 20 bandar raya terselamat di dunia.
42. PN-1253-L15930
Dato' Dr. Firdaus bin Haji Abdullah minta **MENTERI PENERANGAN, KOMUNIKASI DAN KEBUDAYAAN** menyatakan sekiranya pihak RTM akan menerus dan meningkatkan kekerapan penayangan adegan-adegan pendek penggunaan Bahasa Melayu yang betul dalam usaha mengatasi masalah pencemaran Bahasa Melayu. Adakah ura-ura untuk melibatkan stesen-stesen TV swasta turut terlibat dalam usaha ini.
43. PN-1253-L15765
Datuk Paul Kong Sing Chu minta **MENTERI KESIHATAN** menyatakan jumlah kes tangan kaki dan mulut (HFMD) di dalam negara pada tahun 2010, 2011 dan 2012. Nyatakan langkah-langkah yang diambil untuk mengurangkan jumlah kes tersebut.
44. PN-1253-L16117
Dr. S. Ramakrishnan minta **PERDANA MENTERI** menyatakan kajian selidik terbaru oleh Merdeka Center mendedahkan bahawa kebanyakannya rakyat telah hilang kepercayaan dalam sistem pilihan raya. Apakah langkah-langkah yang diambil untuk menukar persepsi ini.

45. PN-1253-L15651
Tuan Khoo Soo Seang minta **MENTERI DALAM NEGERI** menyatakan bagaimana pihak yang membuat aduan atau laporan di balai polis dapat memperolehi maklumat tentang perkembangan terkini dan tindakan-tindakan yang diambil oleh pihak polis terhadap laporan-laporan yang telah dibuat.
46. PN-1253-L15518
Dato' Haji Abdul Rahman bin Bakar minta **MENTERI KEWANGAN** menyatakan apakah usaha-usaha Kerajaan untuk mengurangkan defisit belanjawan yang berlaku sekian lama kerana ianya memberi kesan tidak sihat kepada ekonomi negara. Apakah usaha-usaha dilakukan melalui dasar fiskal dan dasar kewangan negara yang komprehensif telah diambil. Setakat ini, apakah kesan ke atas dasar-dasar berkenaan.
47. PN-1253-L15837
Tuan Saiful Izham bin Ramli minta **PERDANA MENTERI** menyatakan tentang sumber pembiayaan untuk pembelian saham Syarikat Felda Global Ventures Holdings yang diapungkan tahun ini oleh peneroka-peneroka dan kakitangan FELDA serta adakah pembayaran semula untuk pembelian saham-saham tersebut sudah dijelaskan oleh mereka yang terlibat.
48. PN-1253-L16010
Puan Roslin binti Haji Abdul Rahman minta **MENTERI WILAYAH PERSEKUTUAN DAN KESEJAHTERAAN BANDAR** menyatakan langkah-langkah Perbadanan Putrajaya (PPj) bagi menarik antara 3 hingga 5 juta pelancong setahun berbanding hanya sejuta sekarang.
49. PN-1253-L15439
Dato' Dr. Johari bin Mat minta **MENTERI DALAM NEGERI** menyatakan sejauh manakah penerbitan buku-buku motivasi yang berdasarkan Islam di pasaran ditapis.
50. PN-1253-L15725
Tuan Chiew Lian Keng minta **MENTERI PENERANGAN, KOMUNIKASI DAN KEBUDAYAAN** menyatakan sama ada tapak tanah kepunyaan SRJK(C) Chin Woo akan diambil alih oleh Kementerian untuk tujuan pembinaan Kota Warisan dan apakah rasionalnya.
51. PN-1253-L16023
Puan Roslin binti Haji Abdul Rahman minta **PERDANA MENTERI** menyatakan adakah Kerajaan melalui Jabatan Perpaduan Negara dan Integriti Nasional bercadang menubuhkan Pusat Pemulihan Sivik bagi menyediakan program pendidikan dan kaunseling khusus bagi menempatkan kumpulan berkelakuan biadab dan tidak menghormati undang-undang negara.

52. PN-1253-L15986
Dr. Syed Husin Ali minta **MENTERI PERDAGANGAN ANTARABANGSA DAN INDUSTRI** menyatakan statistik dan data berkaitan pendapatan yang dijana oleh Kerajaan melalui penjualan AP.
53. PN-1253-L15618
Puan Hajah Khairiah binti Mohamed minta **PERDANA MENTERI** menyatakan semakan terakhir ke atas Akta Mahkamah Syariah (Bidang Kuasa Jenayah) 1965 [Akta 355] dan adakah Kerajaan bercadang untuk menaikkan hukuman dalam akta tersebut.
54. PN-1253-L15916
Puan Hajah Dayang Madinah binti Tun Abang Haji Openg minta **MENTERI PELAJARAN** menyatakan adakah “blueprint” pendidikan kebangsaan telah mengambil kira latihan khusus dalam bahasa strategik seperti Mandarin atau Jerman selain Bahasa Inggeris dan Bahasa Malaysia, bagi mewujudkan teknokrat dalam jangka masa panjang.
55. PN-1253-L15375
Puan Hajah Rohani binti Abdullah minta **PERDANA MENTERI** menyatakan langkah-langkah Kerajaan bagi memastikan generasi kedua FELDA berpeluang memiliki rumah sendiri berhampiran tempat asal mereka.

ATURAN URUSAN MESYUARAT DAN USUL-USUL

- | | | | |
|----|----------------|--|-------------------------------|
| 1. | (D.R. 31/2012) | Rang Undang-undang Perbekalan 2013

[Menteri Kewangan] | Bacaan Kali Yang Kedua |
| 2. | (D.R. 37/2012) | Rang Undang-undang Penyelarasan Pencen (Pindaan) 2012 - Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang.”
(4 Disember, 2012)

[Menteri Di Jabatan Perdana Menteri] | |
| 3. | (D.R. 32/2012) | Rang Undang-undang Pengurusan Strata 2012

[Menteri Perumahan dan Kerajaan Tempatan] | Bacaan Kali Yang Kedua |
| 4. | (D.R. 40/2012) | Rang Undang-undang Perkhidmatan Kewangan 2012

[Menteri Kewangan] | “ |
| 5. | (D.R. 41/2012) | Rang Undang-undang Perkhidmatan Kewangan Islam 2012

[Menteri Kewangan] | “ |
| 6. | (D.R. 39/2012) | Rang Undang-undang Bank Negara Malaysia (Pindaan) 2012

[Menteri Kewangan] | “ |
| 7. | (D.R. 35/2012) | Rang Undang-undang Kewangan (No. 2) 2012

[Menteri Kewangan] | “ |
| 8. | (D.R. 38/2012) | Rang Undang-undang Reka Bentuk Perindustrian (Pindaan) 2012

[Menteri Perdagangan Dalam Negeri, Koperasi dan Kepenggunaan] | “ |

9. (D.R. 43/2012) Rang Undang-undang Perbadanan Kemajuan Filem Nasional Malaysia (Pindaan) 2012 “

[Menteri Penerangan, Komunikasi Dan Kebudayaan]

10. (D.R. 42/2012) Rang Undang-undang Binatang (Pindaan) 2012 “

[Menteri Pertanian dan Industri Asas Tani]

11. PN-1253-U15525
Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan supaya disegerakan proses memansuhkan hukuman mati mandatori berdasarkan kepada maklumat berikut:- Menteri di Jabatan Perdana Menteri, Datuk Seri Mohamed Nazri Abdul Aziz berkata, beliau akan mengadakan perjumpaan dengan Perdana Menteri, Datuk Seri Najib Tun Razak dalam masa terdekat bagi membincangkan mengenai satu inisiatif akan dilakukan bagi mewujudkan moratorium (penangguhan) terhadap hukuman mati terhadap mereka yang didapati bersalah memiliki dadah. Mohamed Nazri menegaskan yang Kerajaan sedang menimbang cadangan menangguhkan pelaksanaan hukuman mati terhadap pesalah dadah di negara ini sementara menunggu hasil kajian semula yang dijalankan Pejabat Peguam Negara. Katanya hukuman ganti kes pemilikan dadah sedang dikaji Pejabat Peguam Negara. Sementara, Mohamed Nazri akan berbincang dengan Perdana Menteri supaya kes pemilikan dadah, mereka yang dijatuhi hukuman (mati), akan diminta moratorium, jangan digantung sebab Kerajaan kita sedang meneliti hukuman sedia ada. Mohamed Nazri juga berkata, permohonan moratorium itu wajar memandangkan sebahagian daripada 900 orang yang sedang menunggu hukuman mati ketikaini adalah pesalah dadah. Perlu disebut, kajian ini dilakukan bertujuan menyelamatkan nyawa rakyat Malaysia di luar negara seperti China, Columbia, Peru dan Venezuela yang berdepan hukuman mati akibat menjadi keldai dadah. Antara hukuman terbaik bagi menggantikan hukuman mati mandatori bagi pesalah dadah, Mohamed Nazri berkata, hukuman penjara 30 atau 35 tahun boleh dikenakan kerana kesalahan itu tidak lagi dianggap serius seperti jenayah pembunuhan. Jika hukuman mati mandatori bagi kesalahan dadah dimansuhkan, hakim akan menggunakan budi bicara dalam menentukan hukuman bagi pesalah dadah. Justeru, berdasarkan kepada senario berkaitan, saya mencadangkan agar Kerajaan mempercepatkan proses berkenaan. Jika perlu, satu jawatankuasa khas di peringkat Parlimen wajar diadakan. Ini penting demi untuk keharmonian dan kemakmuran sejagat dan kebijakan kepada keluarga para pesalah."

[Menteri di Jabatan Perdana Menteri]

12. PN-1253-U15526

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan dan mengesa agar kebebasan media berlaku secara sistematik, berhemah dan berintegriti.Tanggapan kebebasan media bagi pemimpin politik berdasarkan kebebasan untuk media yang hanya menyebelahi mereka dan yang seiring dengan mereka sahaja. Politik dan media sememangnya saling memerlukan. Orang politik memerlukan media untuk mempromosi diri dan wawasan mereka dan media pula memerlukan ahli politik sebagai bahan penulisan mereka. Lazimnya hubungan antara ahli politik dan media bagaimanapun tidak selalu kekal harmoni sepanjang masa.Lazimnya ahli politik akan menyanjung media apabila cerita-cerita positif tentang mereka dilaporkan. Namun begitu,apabila berita yang dilaporkan itu tidak positif, media akan dipersalahkan kononnya untuk menjatuhkan reputasi ahli politik terlibat. Kini telah menjadi satu trend apabila media dijadikan "punching bag" oleh ahli politik untuk menafikan berita yang tidak memihak kepada mereka. Ironinya, pihak yang menjadikan media sasaran saman yang rata-rata angkanya mencecah jutaan ringgit dan pihak sama juga yang melaung-laungkan tentang kebebasan bersuara dan menuntut kebebasan media di negara ini.Keadaan berkenaan bukan melibatkan ahli politik sahaja tetapi meliputi sebuah masyarakat dalam konteks kebebasan media. Dan pengamal media yang berintegriti tidak takut untuk mempersempahkan berita berdasarkan fakta. Berani kerana benar. Mereka tidak takut dikritik mahupun menerima kutukan oleh pelbagai pihak. Justeru, bagi menentukan kebebasan media berlaku secara sistematik, berhemah dan berintegriti, apakah pihak Kementerian sedang merangka atau menggubal ke arah mana media negara ini sedang berada. Apakah kerajaan sedar bahawa satu majlis media kebangsaan perlu diwujudkan dan pertubuhan rasmi ini akan menjadi pemantau bagi kedua-dua pihak iaitu pengamal media dan masyarakat. "

[Menteri Penerangan, Komunikasi dan Kebudayaan]

13. PN-1253-U15527

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan agar institusi kewangan mempertimbangkan untuk mempermudahkan pemberian pinjaman kepada pencipta produk inovasi termasuk membabitkan teknologi hijau dalam usaha melahirkan lebih ramai lagi generasi pencipta. Menteri Sains, Teknologi dan Inovasi, Datuk Seri Dr. Maximus Johnity Ongkili menegaskan bahawa sehingga kini banyak syarikat yang mahu membuat pinjaman untuk menjayakan penciptaan sesuatu produk, namun tidak dapat berbuat demikian ekoran syarat ketat institusi kewangan.Justeru, kerana mereka tidak mempunyai rujukan kejayaan lampau ciptaan berkenaan dan menganggap ia sukar dipasarkan. Untuk tujuan itu, pihak kementerian wajar membentuk satu jawatankuasa khas dengan Kementerian Tenaga, Teknologi Hijau dan Air serta Kementerian Kewangan untuk menyelaras kaedah bagi membantu pencipta terbabit.

Kita juga berharap agar peserta atau pemohon dibantu dengan segera, sekali gus dapat menyelesaikan masalah pertimbangan insitusi kewangan yang memproses permohonan itu mengikut prinsip perbankan biasa. Saya juga mencadangkan agar insitusi kewangan mempertimbangkan untuk memberi nilai kepada hak intelek sesuatu produk inovasi yang dibentangkan pencipta bagi proses permohonan pinjaman. Jika ini dapat dilakukan, sudah pasti akan membantu dan menggalakkan para pencipta untuk menghasilkan produk yang bukan sahaja dapat memanfaatkan kepada masyarakat, bahkan dikomersialkan bagi menjana pendapatan yang tinggi."

[Menteri Sains, Teknologi dan Inovasi]

14. PN-1253-U15528

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan agar penglibatan sektor swasta juga diambil kira dalam memantapkan Pelan Pembangunan Pendidikan (PPP) yang dilancarkan oleh Perdana Menteri baru-baru ini yang menekankan kepada konsep ilmu yang mampu dimanfaatkan oleh generasi yang akan datang iaitu selari dengan tuntutan semasa dunia/global. Pelan berkenaan cukup rapi dan kemas di dalam mencipta hala tuju negara ke arah negara maju pada tahun 2020. Pelan yang mantap berkenaan semestinya memerlukan pemahaman dan pelaksanaan yang strategik di kalangan warga pendidik, ibu bapa dan para pelajar. Pelan yang mempunyai tiga gelombang iaitu pada 2013-2015; 2015-2020 dan 2020-2025 itu telah mengambil kira pelbagai harapan, rintangan, cabaran, situasi dunia dan perkembangan kemahiran di kalangan masyarakat. Contohnya, apakah vokasional dan kemahiran (hand-on) telah dihidupkan dan diperkemaskin yang wajar diperkembangkan kepada para pelajar di peringkat sekolah menengah lagi. Ianya sebagai usaha untuk mengimbangi di antara ilmu bersifat akademik dan bersifat kemahiran. Kedua-duanya sudah pasti akan menjadikan negara kita lebih maju di dalam aspek pelajaran dan pembelajaran. Menyedari hakikat berkenaan, saya merasakan pelan berkenaan akan lebih mantap sekiranya peranan sektor swasta diambil kira. Pihak swasta akan menjadi pemangkin kepada konsep pembelajaran sepanjang hayat. Semua firma dan kilang-kilang bertaraf antarabangsa perlu melaksanakan CSR mereka dan memberi ruang/ peruntukan kewangan kepada para pelajar yang ingin melanjutkan pelajaran ke peringkat yang lebih tinggi. Konsep ini telah dilaksanakan dengan jayanya di Australia dan Jerman. Sementara, para pelajar lepasan institusi kemahiran perlu difikirkan tentang ganjaran kepada mereka melebihi daripada yang berasaskan akademik semata-semata. Di masa sama, universiti awam/swasta hendaklah diperbanyakkan di negara ini sehingga peringkat PhD. Lebih penting supaya hasrat pelan ini menjadi kenyataan selari dengan Model Baru Ekonomi (MBE) ke arah menjadikan Malaysia sebuah negara maju berpendapatan tinggi."

[Menteri Pelajaran]

15. PN-1253-U15529

Dato' Haji Abdul Rahman bin Bakar akan mencadangkan:-

"Bahawa Dewan ini menyarau dan mencadangkan agar projek Perumahan Rakyat PR1MA di perbanyakkan lagi dan proses permohonannya dipermudahkan memandangkan rumah atau perlindungan merupakan salah satu keperluan manusia di dunia ini. Rumah juga merupakan suatu jaminan keselamatan dan kesihatan kepada penduduk dunia. Akibat kekurangan rumah atau tempat tinggal yang tidak terurus atau tidak menepati piawaian atau tidak lengkap atau tidak sesuai didiami, sudah tentu akan mewujudkan penyakit masyarakat yang lain termasuk penyalahgunaan najis dada, kecurian, rogol, rompak, samun dan lain-lain. Atas sifat dan kesedaran akan kepentingan rumah kepada penduduk negara ini, pelbagai program telah dilaksanakan antaranya rumah mesra rakyat, rumah PPRT, rumah mampu milik dan rumah kos rendah/sederhana yang telah mendapat sambutan hangat di kalangan rakyat. Namun, melihat kepada penduduk negara kita yang berkembang pada kadar 3.5% setahun, saya rasa pertambahan berkenaan terus meningkat kepada keperluan rumah untuk berlindung. Justeru, pengekalan dan pelaksanaan rumah PRIMA adalah antara yang terbaik terutamanya di kalangan penduduk bandar. Bagaimanapun bilangan rumah berkenaan masih kecil dan perlu diperbanyakkan lagi. Saya suka mencadangkan agar pihak Kementerian Perumahan dan Kerajaan Tempatan (KPKT) terus memberi ruang kepada GLC atau anak syarikat Kerajaan negeri untuk membina rumah PRIMA di samping SPNB dan UDA. Sementara, KPKT juga diminta mempermudahkan proses permohonan secara on-line dan memberikan jawapan segera terhadap permohonan berkenaan. Ini penting sebagai slogan "Rumahku Syurgaku" yang memberi kesan psikologi kepada pemohon (rakyat) kerana dirasakan mereka dihargai. Kalau sesuai, rumah kedua/ketiga juga boleh ditimbangkan kepada pemohon sekiranya berlaku lambakan kepada rumah-rumah PRIMA."

[Menteri di Jabatan Perdana Menteri]

**RISALAT-RISALAT YANG DIBAWA KE DALAM MESYUARAT
(DEWAN NEGARA)**

<u>TAHUN 2012</u>	<u>RISALAT/DOKUMEN</u>	<u>TARIKH DIBENTANGKAN</u>
ST.78	Laporan Tahunan dan Penyata Kewangan Suruhanjaya Syarikat Malaysia (SSM) Bagi Tahun 2011	5 Disember 2012
ST.84	Laporan Tahunan dan Penyata Kewangan Universiti Kebangsaan Malaysia (UKM) Bagi Tahun 2011	5 Disember 2012
ST.87	Laporan Tahunan dan Penyata Kewangan Lembaga Lada Malaysia Bagi Tahun 2011	5 Disember 2012
ST.91	Laporan Tahunan dan Penyata Kewangan Lembaga Kemajuan Kelantan Selatan (KESEDAR) Bagi Tahun 2011	5 Disember 2012
ST.101	Laporan Tahunan dan Penyata Kewangan Lembaga Kenaf dan Tembakau Negara Bagi Tahun 2011	5 Disember 2012
ST.112	Laporan Tahunan dan Penyata Kewangan Lembaga Getah Malaysia Bagi Tahun 2011	5 Disember 2012
ST.115	Laporan Tahunan dan Penyata Kewangan Lembaga Kemajuan Johor Tenggara (KEJORA) Bagi Tahun 2011	5 Disember 2012
ST.139	Laporan Tahunan dan Penyata Kewangan Suruhanjaya Perkhidmatan Air Negara (SPAN) Bagi Tahun 2011	5 Disember 2012
ST.140	Laporan Tahunan dan Penyata Kewangan Kumpulan Wang Sumbangan Modal Pembetungan (KWSMP) Bagi Tahun 2011	5 Disember 2012
ST.141	Laporan Tahunan dan Penyata Kewangan Suruhanjaya Tenaga Bagi Tahun 2011	5 Disember 2012